

Ki manniè moun lontan té ka viv ?

Sé sa pawol sé poveb-la ka montré nou.

Annou pran yo chak la kon an ti finet ouwè anlè lavi antan lontan.

1

SÉ SILON VAN, LATJÉ POUL PANCHÉ !

Ni tjektan di sa, ou té ka jwenn poul lib bò kay tout moun lakanpay.

Té ni poul jenga (plim nwè épi blan), poul madagaska (kou pliché), poul bas (poul djenm épi poul gwo ras mélanjé), poul frizé (yo prétan poul-tala té ka présèvé met-li kont tout mové ajisman...), épi té ni poul djenm.

Sé tala té ka pasé tan-yo ka graté jaden, té ka dékouvé tousa ki planté. É bien défwa ou té ka rivé trapé dézod épi vwazen'w pou lapéti-yo.

Men lè ou té ni lokazion gadé yo alé adan an savann, épi gran latjé-yo doubout anlè do-yo kon an vwel yol anmitan lanmè, mi bel plézi !

Délè, an ti labriz té ka souflé, épi i té ka kouché latjé-a silon sans-li : an kou adwet, an kou agoch.

Enben sé di la pawol-la pati : « **Sé silon van, latjé poul panché !** »